

## Is Duas Columbas

Bolat custa nova trista,  
e stragat che malu bentu,  
aciuntu s'est a sa lista  
un'atru nou lamentu.

Lodis, canticus e curbas  
si ndi pesant de s'altari,  
oi is duas columbas  
s'atòbiant po sempri a pari.

Una fiat de brullas arricas,  
contra sana e gioiosa;  
de ingestus e arripicas,  
sempri allirga e spassiosa.

S'atera fiat prus serena,  
precisa in su cantai.  
De is contras maistra vena  
si ndi eus arregordai.

Oi in artu bolais  
liberas de pensamentu  
e cun is steddus cantais  
creau e firmamentu.

Dimorais in su giardinu  
cun is pillonis e froris,  
e a su tronu divinu  
donais pinta e coloris.